

醫效秘傳

御卷二

醫效秘傳卷二



古吳葉桂天士述

後學吳金壽子音校



傷寒諸證論

發熱

發熱者怫怫然發於皮膚之間熛熛然散而成熱者是也與潮熱寒熱煩躁之熱不同煩躁之熱熱在內者也潮熱之熱有時而熱不失其時寒熱之熱寒已而熱相繼而發至於發熱則無時而發也然有翕翕發熱蒸蒸

發熱之異翕翕發熱者若合羽所覆明其熱在表也故
與桂枝湯汗以散之蒸蒸發熱者若薰蒸之蒸明其熱
在內也故與調胃承氣湯下以除之然發熱屬表者卽
風寒客於皮膚陽氣怫鬱所致也發熱屬裏者卽陽氣
下陷入陰中所致也觀其熱所從來而汗下之症明矣
若熱先自皮膚發者知邪氣在表者也熱先自裏生而
達於表者知邪氣在裏者也舉斯二者則邪之在表在
裏又明矣惟其在表在裏俱有發熱故半表半裏亦有

發熱何者以表症未罷邪氣傳裏裏未作實是爲半表
半裏然同一發熱也或始自皮膚而漸傳爲裏熱或始
自內熱而外達於肌表故邪氣在表而發熱者表熱而
裏不熱也邪氣在裏而發熱者裏熱甚而達於表者其
在半表半裏而發熱者則表裏俱發熱者也難經云發
熱惡寒者發於陽也無熱惡寒者發於陰也然太陰厥
陰皆不發熱惟少陰病始得之雖有發熱之症亦脈沈
下利手足冷爲異爾故與麻黃附子細辛湯汗以散之

然有汗後發熱者或表邪未盡或裏症已具或邪在半表半裏之間有下後發熱者或宿垢未盡或丸藥悞下有勞復發熱者蓋因新瘥後津液未復血氣尙弱或語言以傷氣思慮以傷神邪熱隨至原病復舉當調和營衛清解邪熱爲佳也有食復發熱者須滌邪扶正消食丸爲妙也雖然發熱傷寒之常也如有陰陽俱虛及下利與新汗後又皆惡其熱也豈可一概論耶

惡寒

惡寒者風寒客於營衛之中也惟其風寒客於營衛則
灑淅然惡寒也惟其營衛之受風寒則嗇然不欲舒也
其惡寒者非惡寒熱之寒又非惡風也蓋惡風見風則
惡若居密室之內幃帳之中則坦然自舒也至於惡寒
者雖不見風亦自裏寒雖身大熱亦欲近衣始發之閒
戰慄鼓頷甚則體振肌膚粟起毫毛畢直雖在幃帳之
中重衣厚被亦不能禦其寒也且寒熱之寒謂寒熱更
作熱至則寒無矣其惡寒者雖身發熱而不欲去衣甚

至向火覆被猶不遏其寒也所以然者由陰氣上入陽中或陽微或風虛相搏所致惡寒一切屬表若下症悉具而微惡寒者是表猶未解當先解表乃可攻裏也經曰發熱惡寒發於陽無熱惡寒發於陰如傷寒或已發熱或未發熱若先惡寒必繼之以發熱此則發於陽也若惡寒而踰臥脉細而緊此則發於陰也在陽者可發汗在陰者可溫裏惡寒雖悉屬表而在表自有虛實之別若汗出而惡寒者爲表虛可解肌無汗而惡寒者爲

表實可發汗如汗後仍不解反惡者虛故也芍藥甘草
附子湯主之如或少陰病惡寒而踰臥手足厥冷自利
煩躁脉不至者又爲不治之症

按發熱惡寒明是傷寒之候然亦有近似傷寒者如
脉浮而數發熱惡寒是傷寒症也若脉浮而發熱惡
寒或有痛處是癰疽症也脉浮而濇發熱惡寒或膈
實嘔吐噫噎吞酸是傷食症也脉浮而弦發熱惡寒
或惡食是欲作瘧也由是觀之發熱惡寒之症豈同

一而語哉

背惡寒

背爲陽腹爲陰背惡寒者陽氣不足陰寒氣盛故也若風寒在表而惡寒則一身盡寒矣若陽氣衰陰氣盛寒邪在裏口中和無熱而背惡寒者屬少陰也宜溫之附子湯主之若陰氣微陽氣盛熱邪陷內口燥熱而背惡寒者屬陽明也宜清之白虎加人參湯主之三者均自背惡寒也有陰陽寒熱之不同而於口中潤燥得之

惡風

惡風者見風則怕在密室之中無所惡也蓋因風邪傷衛衛氣虛弱腠理不密所以汗出而惡風也然衛氣者能溫分肉充皮膚肥腠理司開闔者也若風邪中於衛則必惡風何也風則傷衛寒則傷營衛爲風邪所中分肉不溫而熱矣皮毛不充而緩矣腠理失其肥則疎而不密開闔失其司則泄而不固是以惡風也然惡風惡寒二症均爲表症以惡風與惡寒比之惡寒者嗇嗇然

而憎寒卽不當風而自惡寒其惡風者得居密室之中
幃帳之內舒緩而無所畏也或用扇或當風則淅淅然
而惡此爲惡風也惡寒有屬於陽有屬於陰若是惡風
悉屬於陽非若惡寒有陰陽之別也故三陰之症並無
惡風者是也然惡風雖悉屬表而發散又有不同若無
汗而惡風爲傷寒當發其汗汗出而惡風爲中風當解
其肌若下症悉具而惡風未罷者當先解其外也又有
汗多亡陽與風濕皆有惡風之症若發汗過多遂漏不

止衛虛亡陽惡風脉浮者必以桂枝加朮附湯溫其經
而固其衛若風濕相搏骨節煩疼濕勝自汗皮腠不密
惡風短氣必用甘草附子湯散其濕而固其衛由是觀
之惡風屬衛明矣

寒熱

寒熱者謂往來寒熱也經曰血弱氣虛腠理受邪陰陽
相勝邪正相爭而作矣若邪氣之入也而正氣不與之
爭但熱而無寒也今熱而寒者謂正氣與邪氣分爭於

是寒熱作矣爭則氣鬱不發於外而寒熱爭焉爭甚則憤然而熱故寒已而外熱作焉斯乃寒熱之理也或謂寒熱者陰陽爭勝也以陽勝則熱陰勝則寒斯乃陰陽之爭也何則以寒爲陰而熱爲陽以裏爲陰而表爲陽邪之客於表者爲寒邪與陽爭則爲寒矣邪之入於裏者爲熱邪與陰爭則爲熱矣其邪半在表半在裏外與陽爭而爲寒內與陰爭而爲熱是則表裏不拘內外不定或出或入由是寒熱且往且來而間作也是以往來

寒熱多屬半表半裏之症一云陽不足則陰邪出表而
與之爭故陰勝而爲寒陰不足則陽邪入裏而與之爭
故陽勝而爲熱邪居表多則多寒邪居裏多則多熱邪
在半表半裏則寒熱平半矣審其寒熱多少視其邪氣
深淺俱用小柴胡湯和之若寒多加桂枝熱多加大黃
是大法也

似瘧

似瘧者與發熱惡寒往來寒熱相似而實非也寒熱似

瘧者作止有時若往來寒熱則作止無時或往或來日
有至三五發甚則十數發者是也至於發熱惡寒者爲
發熱時惡寒並不見惡寒時發熱亦不見也不若此寒
已而熱熱已而寒也然有太陽似瘧有陽明似瘧有厥
陰似瘧有婦人熱入血室似瘧症雖同而用藥異也

朝熱

潮熱者若潮水之潮其來不失其時一日一發日晡時
至者是也日若三五發卽是發熱非潮熱也潮熱者以

表邪傳至陽明胃府胃實而致潮熱也蓋陽明旺於未申時所以發於日晡是日晡所發潮熱者屬陽明也惟其陽明故潮熱爲可下之症經曰潮熱者胃實也又曰潮熱者此外欲解可攻其裏又曰若熱不潮未可與承氣湯雖然潮熱屬裏實可下之症或脉浮而緊潮熱而利或小便難大便澀與夫潮熱於寅卯則屬少陽潮熱於巳午則屬太陽是皆尙有表邪未全入裏先須解表待小便利大便硬而燥渴者方可攻之

自汗

自汗者不因發散而自然汗出者是也蓋衛爲陽能護衛皮膚肥實腠理禁固津液不得妄泄若邪干於衛不能衛固於外則皮膚爲之緩腠理爲之疎由是津液妄泄漉漉然潤漉漉然出謂之自汗也故曰風暑濕邪干之皆令自汗惟傷寒人獨不出汗因傷營而不傷衛以寒氣收藏故也若寒漸入裏傳而爲熱亦令汗出以熱則營衛通腠理開而汗泄矣然自汗之症又有表裏之